

29. april 2014

UPA 2014/74
Anders Olsen

Naalakkersuisut 2015mut Aningaasanut Inatsimmi Nuummi atlantiku ikaarlugu timmisartunut suluusalinnut mittarfiornissap misissorneqarnissaanut aningaasa-leeqqullugit Naalakkersuisut peqquneqarnissaannik Inatsisartut aalajangiiffigisas- saattut siunnersuut.

(Inatsisartunut ilaasortaq Andreas Uldum, Demokraatit)

Nunatsinni illoqarfiit pingaarnersaanni inuttunersaannilu, tassalu Nuummi atlantiku ikaarlugu timmisartunut suluusalinnut mittarfiornissap misissorneqarnissaanut aningaasa- liissuteqaqqusilluni siunnersuuteqartoq Andreas Uldum Demokraatineersoq Siumumiit siunnersuutaanut qutsavigaarput.

Imarpik qulaallugu timmisartunut ilaasartut amerlanersaasa Nuummiit Nuummullu aallaa- veqarnerat tunngavigalugu atlantiku ikaarlugu timmisartunut suluusalinnut mittarfiup Nuummiissinnaanera pissusissamisoortutut Siumumiit isumaqarfigaarput. Tassami nunatta avataaniit tikittartut 40 %-iisa missaat Nuummut ingerlaqqittartuusut Assartuussineq pillugu Isumalioqatigiissitap isumaliutissiissutaani erseqqissarneqartunut ilaavoq.

Kisitsisit saqqummiunneqartut toqqammavigalugit soorunami eqqarsalersitsinermik kingu- neqarpoq, politikikkummi anguniagassatut aallaavigisariaqaratsigu nunatsinni inuiaqa- tigiinnut amerlanerpaanut aningaasatigullu iluaqutaasussat pitsaanerpaat anguniartuar- nissaat. Allatut oqaatigalugu aningaasaqarnikkut namminiilivinnissamat periarfissanik annertusaanissaq inuiaqatigiittut pisussaaffigaarput, taamaattumik ilaatigut angallannikkut pisariillisaaneq aqqutigalugu aningaasartuutikillisaanissaq avaqqunneqarsinnaanngitsutut Siumumiit isumaqarfigaarput. Taamaakkaluartorli pingaaruteqarpoq piffinni ataasiakkaani pilersitsiortunnginnermi siunissamat isigisumik nunatsinni pissutsinut tamanut pitsaanerpaamik aalajangiisarnissarput.

Nunatta avataanut avataaniillu angalasut Nuummut attuumassuteqartut amerlassusaat eqqarsaatigalugu, taamatullu Nuummi eqqaanilu annertuumik inuussutissarsiutitigut siuariartortoqarnissaa pilissappat avaqqunneqarsinnaanngitsutut isumaqarfiginarpoq Nuummi imarpik ikaarlugu mittarfissamik pilersitsisoqarsinnaaneranik misissuisoqarnissaa.

Tamannalu aamma Naalakkersuisut akissuteqaataanni sillimmartaartoqarnera ersarissar-

neqarpoq, Aningaasanummi Inatsimmi misissueqqissaarnernut aningaasanik immikkoortit-sisoqareersimanera Siumumiit maluginiakkatta pingaaruteqartut ilagaat.

Imarpik ikaarlugu timmisartumut ilaasartut amerlanersaasa Nuummiit Nuummullu aallaa-veqarnerat kisiat tunngavigalugu mittarfiliortoqarnissaanik misissuisoqarnissaanik isuma piviusorsiuunngitsutut Siumumiit isumaqarfigaarput, ilisimasatsitummi silap pissusaa piviu-sunngortitsiniarnermi aalajangiisuulluinnarsinnaasutut inissisimammat.

Assartuussineq pillugu Isumalioqatigiissitammi ilaatigut uppersarsagaanut ilaavoq Nuup silaa naligninnaasumik Kangerlussuup silaanit ajornerusartoq, timmisartullu silamik peqqu-teqarlutik minngitsoortarnerannut tunngasut Nuummi annertunerujussuullutik.

Taamaammat Siumumiit sukumiisumik misissuisoqarnissaa kissaatigaarput, qularnaat-sumik Nuummi mittarfiliorsinnaanermut isuma illersorsinnaasumik pisinnaanersoq qulak-keerumallugu.

Taamaattumik Naalackersuisut allannguutissatut siunnersuutaat Siumumiit ilaleratsigu matumuuna oqaatigissavarput, Nuup mittarfiliorfigineqarsinnaaneranut misissuisarsima-nerit inaarsarneqarnissaat anguneqarnissaa pisinnaaniassammat.

Taamatut Siumumiit oqaaseqarluta siunnersuut Inatsisartut Sanaartornermut ataatsimii-titaliaanut suliareqqitassanngornissaa innersuussutigaarput.